

Kann ech considéréieren, dass d'Resolu-  
toun zrëckgezunn ass?

» **Plusieurs voix.** - Jo!

(*Interruptions*)

» **Mme le Président.** - Jo, dann ass dat  
esou décidéiert, an da brauche mer net méi  
driwwer ofzestëmmen a kommen zum  
nächste Punkt op eisem Ordre du jour.

» **M. Aly Jaerling** (*Indépendant*). - Ech  
hätt awer gär, dass déi Prozedur do an  
d'Reglement ageschriww e gëtt!

(*Hilarité générale*)

» **Mme le Président.** - Ech géif den Här  
Jaerling bieten, dann d'Commission du Rè-  
glement vun där Proposition ze saiséieren.

Mir kommen dann zum nächste Punkt vun  
eisem Ordre du jour, dat ass de Projet 5938,  
Projet de loi portant réglementation des  
compensations et récupérations en faveur  
du personnel militaire de carrière, etc., etc.  
De Rapporteur, den Här Glesener, huet  
d'Wuert.

#### 4. 5938 - Projet de loi portant réglementation des compen- sations et récupérations en faveur du personnel militaire de carrière pour sa participa- tion aux entraînements et ins- tructions militaires ainsi qu'au service de garde

*Rapport de la Commission des Affaires  
étrangères et européennes, de la  
Défense, de la Coopération et de l'Immi-  
gration*

» **M. Marcel Glesener** (*CSV*), *rappor-  
teur*. - Madame Presidentin, villmools Merci.  
Kolleginnen a Kollegen, de virleiende  
Projet ass ënner anerem d'Konsequenz vun  
der Arméiereform, déi mer de 17. Dezember  
2007 hei gestëmmt hunn. Déi Reform huet  
eiser Arméi eng nei Determinatioun, ver-  
bonne mat neien an zousätzlechen Aufgabe  
ginn. Ech viséieren heimat d'Applikatioun vu  
Friddens- an humanitäre Missiounen am  
Numm vun der NATO a vun der Europä-  
escher Unioun an esou weider.

Bei esou Missiounen, Kolleginnen a Kol-  
leegen, bedeite geziilte Virbereedungs-  
moosname wéi och d'Exekutioun zousätz-  
lech Belaaschtung fir eis Zaldoten. Eng spe-  
ziell Primëregelung ass eng natierlech Fol-  
leg vun deenen zousätzleche Belaaschtun-  
ge par rapport vun eisen Zaldoten. De  
virleiende Projet schafft déi legal Basis vun  
dësem Primësystem. D'maximal Héicht vun  
de Primë fir Offizéier, Ënneroffizéier a Ka-  
préil gëtt duerch d'Gesetz festgehalen. Am  
Projet de loi fannt Dir déi Beträg.

Et si Beträg a Primen, déi nëmmen zur Aus-  
bezuelung komme bei engem Asaz iwwer  
24 Stonnen. D'Ausbezuelungsmodalitéiten  
an och d'Modalitéit vun der jeeweileger  
Héicht vun deene Primë sinn an engem Rè-  
glement grand-ducal festgehal.

Dat Règlement louch dem Projet de loi bäi,  
jiddweree konnt also Kenntnis dovun huel-  
en, sou datt mir och an der Kommissioun  
dat Ganzt konnten examinéieren. All déi Pri-  
men - dat ass wichteg ervirzehiewen - sinn  
net pensionabel an och net imposabel. De  
Statsrot war net där Meenung, hien huet  
awer keng Oppositioun formelle ugemellt.

Zur Erënnerung: Beim Statut unique, deen  
den 1. Januar 2009 a Kraaft getrueden ass,  
hu mer déiselwecht Regelung an Zesum-  
menhang mat den Iwwerstonnen appli-  
zéiert, an deemzufolleg war eis Kommis-  
sioun der Meenung, datt och hei bei dësem  
Projet fir d'Arméi déiselwecht Moosname  
solle festgehele ginn. Deemzufolleg ware  
mer och der Meenung, net de Statsrot ze  
suivéieren a beim Regierungstext ze blei-  
wen.

Dee Projet ass den 1. Oktober 2008 vum Mi-  
nister Schiltz déposéiert ginn. Zur legislati-  
ver Prozedur verweisen ech op mäi schrëft-  
leche Bericht, do steet alles dran, ech  
brauch dat net méi mëndlech hei ze widder-  
huelen.

Ech wëll just betounen, datt d'Diskussioun-  
nen ëm eng nei Primëregelung fir d'Arméi  
ronn 15 Joer ugedauert hunn. Et ass dem  
Verdeedegungsminister, dem Här Schiltz,  
sâi Mérite, no der Arméiereform och déi Pri-  
mendiskussioun op e gutt Enn bruecht ze  
hunn.

Här President, Kolleginnen a Kollegen,  
eis Kommissioun huet dëse Projet eestëm-

meg ugeholl, an ech bieten och d'Chamber  
datselwecht ze maachen. Ofschléissend  
ginn ech och den Accord vun der CSV-Frak-  
toun.

Kolleginnen a Kollegen, dat war et. Wéi  
Der gesitt, hunn ech mech - wéi mer fréier  
esou schéi gesot hunn - militäresch kuerz-  
gefaasst. Ech bieten lech also, dee Projet  
ze stëmmen, a soen lech Merci fir Är Op-  
mierksamkeet.

» **Plusieurs voix.** - Très bien!

» **Mme le Président.** - Merci, Här Rap-  
porteur. D'Wuert huet elo den Här Goerens.

*Discussion générale*

» **M. Charles Goerens** (*DP*). - Madame  
Presidentin, esou wéi mer dat vum Här Gle-  
sener gewinnt sinn, mécht e vill Rapporten  
iwwert d'Défense, an déi Rapporten, déi hie  
mécht, déi mécht e gutt. Wann ech dat nach  
eng Kéier ënnersträichen, dann ass et, well  
ech dat virdru bei eenzelne Geleeënheete  
versommt hunn ze soen. Duerfir wollt ech  
dat elo nohuelen an an engems den Accord  
vu menger Fraktioun zu deem Projet hei  
bréngen.

» **Plusieurs voix.** - Très bien!

» **Mme le Président.** - Merci, Här Goe-  
rens. Den Här Fayot huet d'Wuert.

» **M. Ben Fayot** (*LSAP*). - Jo, Madame  
Presidentin, ech wollt och dem Rapporteur  
Merci soe fir sâi Rapport. Den Här Glesener  
ass Spezialist vu militäresche Saachen zu  
Lëtzebuerg.

(*Interruption*)

An déi Rapporten, déi hie mécht, déi sinn  
effektiv esou, dass mer net vill Wieder méi  
brauchen doriwwer ze verléieren, an ech  
ginn och domat den Accord vun der LSAP-  
Fraktioun.

» **Mme le Président.** - Merci, Här  
Fayot. D'Regierung huet d'Wuert.

» **M. Jean-Louis Schiltz**, *Ministre de  
la Défense*. - Madame Presidentin, ech wollt  
mech alle Virriedner uschléissen, dem Rap-  
porteur villmools Merci soen, deenen dräi  
Riedner och Merci soe fir hir exzellent Bâi-  
träg, deenen ech...

(*Hilarité*)

...honnertprozenteg bäiflichten. Ech si frou,  
datt mer an esou enger grousser Harmonie  
heimadder e Problem, deen eis 17 Joer  
laang begleet huet, ofschléisse kënnen.

» **M. Charles Goerens** (*DP*). - Här Pre-  
sident, et ass ëmmer gutt, wann de Minister  
vun der Défense e gewëssene Sënn fir Iro-  
nie huet an dat och zum Ausdrock bréngt.

(*Hilarité*)

» **M. Jean-Louis Schiltz**, *Ministre de  
la Défense*. - Harmonie! Harmonie!

(*Hilarité*)

» **Mme le Président.** - Harmonie!

(*Interruption*)

Merci. Mir kommen dann elo zum Vote.

**Vote sur l'ensemble du projet de loi  
et dispense du second vote constitu-  
tionnel**

De Vote fänkt un. Vote par procuration. Fin  
du vote. De Projet de loi 5938 ass ugeholl  
mat 59 Jo-Stëmmen.

*Ont voté oui: Mmes Sylvie Andrich-Duval  
(par M. Marcel Oberweis), Nancy Arendt, M.  
Lucien Clement, Mmes Christine Doerner  
(par Mme Martine Stein-Mergen), Marie-Jo-  
sée Frank, Fabienne Gaul, MM. Marcel Gle-  
sener, Norbert Hauptert, Mme Françoise  
Hetto-Gaasch (par M. Lucien Clement),  
MM. Ali Kaes (par M. Laurent Mosar), Paul-  
Henri Meyers, Laurent Mosar, Marcel Ober-  
weis, Gilles Roth, Marcel Sauber, Jean-Paul  
Schaaaf (par Mme Nancy Arendt), Marco  
Schank (par M. Paul-Henri Meyers), Marc  
Spautz, Mme Martine Stein-Mergen, MM.  
Fred Sunnen, Lucien Thiel, Lucien Weiler  
(par M. Lucien Thiel), Raymond Weydert et  
Michel Wolter (par M. Marc Spautz);*

*MM. Marc Angel (par M. John Castegnaro),  
Alex Bodry (par M. Roger Negri), John Cas-  
tegnaro, Mme Claudia Dall'Agnol, M. Fern-  
and Diederich, Mme Lydie Err, MM. Ben  
Fayot, Jean-Pierre Klein, Mme Lydia  
Mutsch, MM. Roger Negri, Jos Scheuer, Ro-  
main Schneider (par Mme Claudia  
Dall'Agnol), Roland Schreiner et Mme Vera  
Spautz;*

*MM. Eugène Berger, Xavier Bettel, Mme  
Anne Brasseur (par M. Xavier Bettel), M.  
Fernand Etgen (par M. Carlo Wagner), Mme  
Colette Flesch, MM. Charles Goerens, Paul*

*Helminger (par M. Eugène Berger),  
Alexandre Krieps, Claude Meisch (par M.  
Alexandre Krieps) et Carlo Wagner;*

*MM. Claude Adam, François Bausch (par  
Mme Viviane Loschetter), Félix Braz, Ca-  
mille Gira, Jean Huss, Henri Kox et Mme Vi-  
viane Loschetter;*

*MM. Gast Gibéryen, Jacques-Yves  
Henckes, Jean-Pierre Koepp et Robert  
Mehlen.*

Gëtt d'Chamber d'Dispens vum zweete Vote  
constitutionnel?

(*Assentiment*)

Et ass also esou décidéiert.

Mir kommen op deen nächste Punkt vun ei-  
sem Ordre du jour. Dat hunn ech net a men-  
gem Dossier, mä dat ass d'Interpellatioun  
vum Här Eugène Berger iwwert d'Politique  
en matière d'amélioration des performances  
énergétiques des bâtiments d'habitation.  
Här Berger, Dir hutt d'Wuert.

#### 5. Interpellation de M. Eugène Berger au sujet de la poli- tique du Gouvernement en matière d'amélioration des performances énergétiques des bâtiments d'habitation

» **M. Eugène Berger** (*DP*), *interpella-  
teur*. - Merci, Madame Presidentin. Dir Dam-  
men an Dir Hären, wann ech eng Interpella-  
tioun iwwert déi energetesch Aspekter am  
Hausbau zu Lëtzebuerg haut an der Cham-  
ber maachen, da muss ech fir d'Aféierung e  
bësse méi wäit, méi global aushuelen. Dat  
passt jo och dann an de Kader vun dësem  
Nomëtteg, wou mer schonn e längeren Dé-  
bat haten och iwwert d'Kooperatioun.

Well wann ee vun Energie schwätzt, dann  
hänkt déi Fro bekanntlech ganz enk mat der  
Thematik vum Klima zesummen, engem  
Klima, dat sech verännert, enger Atmos-  
phär, déi sech lues, awer sécher ophëtzt  
duerch den exzessiven Energieverbrauch  
op eisem Planéit, eng Energie, déi haut zu  
groussen Deeler nach aus fossile Brennstof-  
fer gewonne gëtt.

Deen ongehemmte Verbrauch vum Pétrol a  
senge Produkter ass maassgeblech res-  
ponsabel fir déi CO<sub>2</sub>-Emissiounen, déi eist  
Klima an de leschte Joren ëmmer méi  
verännern. D'Konsequenze vun dëse  
Changementer hunn eis Wëssenschaftler  
an d'UNO-Experte virgerechent. Wa mer  
d'Kéier net kréien, wäerten all déi Change-  
menter dramatesch Ausmoossen unhuelen.  
D'Verännerunge vum Klima duerch massiv  
CO<sub>2</sub>-Ausstéiss wäerte Konsequenzen hunn  
op d'Ëmwelt, op d'Déieren, d'Planzen, an  
och d'Mënsche wäerte vun de Veränne-  
runge vum Klima getraff sinn. A wéi esou oft  
riskéieren dann déi Schwächst, dat heescht  
d'Mënschen aus den Drëtt-Welt-Länner, déi  
Éischt ze sinn, déi dovunner getraff sinn.

Bon, dat sinn Zeenarien, déi ganz oft da  
wäit ewech gewise ginn, wou ee mengt, dat  
géif eng Kéier a ganz, ganz wäiter Zukunft  
kommen, mä dat ass awer net esou de Fall,  
a wann een einfach nëmme ronderëm sech  
kuckt, gesäit een, datt schonn eng ganz Rei  
Saachen amgaang sinn.

Mir hunn ëmmer méi extrem Wiederkaprio-  
len, an och fir mech perséinlech ass et zum  
Beispill interessant festzustellen, a wéi en-  
gem schnelle Rhythmus zum Beispill hei an  
Europa d'Gletschere schmélzen. Wou ech  
virun 20 Joer als Biergsteiger hu misse  
Steigeisen hunn, fir virunzekommen, kann  
een haut mat Turnsclappen iwwer Steng  
spadséieren.

D'Klimaverännernunge ginn och ëmmer méi  
eng Fro vu Käschten. Sou hu Versécher-  
ungsgesellschaften virgerechent, datt an de  
vergaangene Joren extrem Klimaereignis-  
ser materiell Schied verursaacht hunn, déi  
d'Gesellschaft iwwer 100 Milliarde kascht  
hunn. Dat sinn nëmmen an där Rechnung  
Schied, déi elo materiell sinn, wou Haiser  
oder soss aner materiell Gidder zerstéiert gi  
sinn. Do ass emol net dran agerechent, wat  
dat eventuell och mëttel- oder laangfristeg  
vu Schied ka ginn duerch Klimaverännerun-  
gen an der Ëmwelt an an der Natur.

An honnert Wieder wéi an engem ass kloer,  
datt mer gefuerdert sinn, fir dëse Klima-  
verännernungen entgéintzewierken. Dat  
heescht konkret, mir mussen kucken, datt  
mer eis CO<sub>2</sub>-Emissiounen drastesch redu-  
zéieren, an da si mer zrëck bei der Fro vun  
der Energie an dat bréngt mech elo méi no  
un de Punkt, un de Kär vun eiser Diskus-  
sioun haut de Mëtteg.

Mir müssen also kucken, datt mer eis Ener-  
gie reduzéieren, an do gëtt et jo dann

haaptsächlech zwou Achsen: Entweder  
kucke mer op aner Energieformen, op net  
fossil Brennstoffe ze kommen, respektiv  
musse mer kucken, datt mer manner Ener-  
gie verbrauchen.

D'CO<sub>2</sub> - an Energieproblematik ass sécher  
eng weltwäit, dat hunn ech elo gesot, mä  
mir müssen och kucken op nationalem  
Plang, datt mer och do eis Responsabilitéit  
iwwerhuelen. Mir hunn dat an engem inter-  
nationalen Accord, dem Kyoto-Protokoll, ge-  
maach, an deem mer eis engagéiert hunn,  
eis CO<sub>2</sub>-Emissiounen ëm 28% ze reduzéiere  
par rapport zu 1990.

Déi grouss Erausfuerderung besteet doran-  
ner, fir dës Verflüchtung konkret hei zu Lët-  
zebuerg ze realiséieren. An ech muss soen,  
mir sinn awer nach wäit vun dësem Zil  
ewech. Och wann den Ëmweltminister  
gëschter eng Pressekonferenz ginn huet a  
gemaach huet, wéi wa mer op dem gudden  
Wee wieren, dann ass dat awer an der Real-  
itéit net de Fall.

Ech wëll hei nëmmen e Communiqué zi-  
téiere vun deene Gréngen, déi haut soen:  
„CO<sub>2</sub>-Emissiounen: Upaken - net uschmie-  
ren, Här Minister!“ Wou se soen: „Er unter-  
schlägt unverrückbare Fakten. Die Regie-  
rung hat das Kyoto-Ziel um 23% verfehlt.“ -  
An da soe se och nach: „Der Rückgang der  
CO<sub>2</sub>-Emissionen ist nicht die Folge einer  
Trendwende, sondern hat eindeutig kon-  
junkturelle Ursachen.“

An da soe se, de Minister, dee soll also:  
„...in einem zentralen Zukunftsthema in aller  
Sachlichkeit (...) Die Klimadebatte darf sich  
nicht an den persönlichen Ambitionen des  
Ministers hinsichtlich des 7. Juni orientie-  
ren.“

(*Interruptions*)

Souwäit déi Gréng, mä och..., mä och...

» **Une voix.** - Félicitatiounen!

» **M. Eugène Berger** (*DP*), *interpella-  
teur*. - Merci, Madame Presidentin. Mä och  
Greenpeace seet an enger Stellung zu där  
Pressekonferenz vu gëschter, datt: «Les  
émissions de CO<sub>2</sub> au Luxembourg ont dimi-  
nué notamment à cause des facteurs ex-  
ternes comme la crise économique et des  
prix de combustibles fossiles en hausse.»

Nëmme fir ze soen, datt also hei zu Lëtze-  
buerg nach net d'Welt an deem Punkt an  
Uerdnung ass, datt mer nach musse ganz  
vill Effortë maachen. An den Hauptverursa-  
acher vum CO<sub>2</sub> hei zu Lëtzebuerg, wéi op vil-  
len anere Plazen an der Welt, wësse mer,  
ass an éischter Linn den Transport, d'Aus-  
stéiss vun dem CO<sub>2</sub> vun den Autoen. Mir  
wëssen, datt mer nach musse ganz vill  
Effortë maachen och hei zu Lëtzebuerg. Mir  
hate schonn eng Debatt iwwert den Trans-  
port, haaptsächlech, datt mer och müssen  
an déi Richtung goen, méi öffentlechen  
Transport ze förderen.

(*Interruption*)

Ech wäert also net op dee Sujet vum Trans-  
port agoen, mä ech wäert op dee Sujet  
agoen, en aneren Domän, wou e ganz  
grousse Spuerpotenzial do ass, en aneren  
Domän, wou och e ganz groussen Impakt  
op eis CO<sub>2</sub>-Emissiounen an op de Port-  
monni vu jiddwerengem Eenzelnen ass: Dat  
ass nämlech de Beräich vum Hausbau a  
vum Héizen.

D'Experten hu gerechent, datt an dësem  
Beräich kënnen am Duerchschnëtt nach iww-  
er 30% un CO<sub>2</sub> hei zu Lëtzebuerg age-  
spuert ginn. Wann ech elo kann op déi  
Zuele goen, déi ech gëschter gesinn hunn,  
dann hu mer am Hausbau eng Reduktioun  
vun 1% erreecht. An dat ass awer nach wäit  
ewech vun deem Potenzial, dee mer also  
hunn am Hausbau, fir op - 30% ze kommen.

Minus 30%, ech soen déi Ziffer, et kann e  
bëssen driwwer oder drënner sinn, do mus-  
sen d'Experten nach schwätzen. Mir mus-  
sen also kucken, dat Potenzial esou vill wéi  
méiglech auszeräizen. Dat musse mer maa-  
chen, andeems mer massiv Haiser bauen,  
déi esou gebaut ginn, dass se an engem  
Standard si vun Niddregenergie- oder Pas-  
sivenergiestandard. Haiser, déi eventuell  
keng fossil Brennstoffe méi brauchen. Mir  
müssen awer och kucken, datt mer massiv  
bestehend Bausubstanz hei zu Lëtzebuerg  
deementspriedend energetesch sanéieren  
duerch eng besser Isolatioun, duerch ther-